



P R A V I L N I K O V I D E O N A D Z O R N O M S I S T E M U
U J P „OLIMPIJSKI BAZEN OTOKA“ D.O.O. SARAJEVO

Sarajevo, 2018. godina

Na osnovu člana 21. stav a, Zakona o zaštiti ličnih podataka BiH ("Službeni glasnik BiH", br. 49/06, 76/11 i 89/11) i Elaborata tehničke zaštite Agencije za zaštitu ljudi i imovine broj: 14-01-18 od 05.03.2018. godine, Nadzorni odbor Preduzeća na XI sjednici održanoj dana 27.09.2018.godine, na prijedlog Direktora Preduzeća, donosi:.

P R A V I L N I K O KORIŠTENJU VIDEONADZORA U JP „OLIMPIJSKI BAZEN OTOKA“ D.O.O. SARAJEVO

I PREDMET PRAVILNIKA

Član 1.

Pravilnikom o videonadzornom sistemu u JP „Olimpijski bazen Otoka“ d.o.o. Sarajevo (u daljnjem tekstu: Pravilnik), bliže se određuje uspostava, pravni osnov, svrha, upotreba videonadzornog sistema u prostorijama JP „Olimpijski bazen Otoka“ d.o.o. Sarajevo, vanjskog dijela objekta i parkinga.

II ODLUKA O VIDEONADZORNOM SISTEMU

Član 2.

Nadzorni odbor JP „Olimpijski bazen Otoka“ d.o.o. Sarajevo donosi Odluku o uvođenju videonadzornog sistema u JP „Olimpijski bazen Otoka“ d.o.o. Sarajevo.

Član 3.

Bliže odredbe o uspostavi, svrhi, upotrebi, zaštiti i obradi ličnih podataka i završnim odredbama vezanim za video nadzor definišu se ovim Pravilnikom.

III ZAKONSKI OKVIR

Član 4.

Zakon o zaštiti ličnih podataka Bosne i Hercegovine član 21.a predviđa uspostavu videonadzornog sistema.

IV SVRHA VIDEONADZORNOG SISTEMA

Član 5.

- (1) Svrha uspostavljanja videonadzornog sistema u JP „Olimpijski bazen Otoka“ d.o.o. Sarajevo je zaštita sigurnosti korisnika bazena, radnika i svih drugih osoba koje se nađu u objektu u toku radnog vremena, kao i prostora oko objekta i parking prostora u periodu van radnog vremena (noćni sati, neradni dani, praznici i sl.).
- (2) Sistem se koristi i za sprečavanje protupravnih radnji usmjerenih prema imovini objekta preduzeća (krađe, provala, oštećenja, uništenja i sl.).

Član 6.

Dozvoljena je upotreba videonadzornog sistema u smislu vođenja evidencija u skladu sa članom 43. Zakona o radu Federacije Bosne i Hercegovine.

V OBIM PODATAKA VIDEONADZORA

Član 7.

- (1) Videonadzorni sistem objekta preduzeća obuhvata:
 - a) Unutrašnje i vanjske kamere;
 - b) Nadzorne kamere imaju IC noćno snimanje;
 - c) Uređaji za pohranu videozapisa deponuju i arhiviraju videozapise u trajanju od minimalno 30 dana.
- (2) Vrsta podataka koji se prikupljaju i pohranjuju je video zapis sa datumom i tačnim vremenom dešavanja.

Član 8.

- (1) JP „Olimpijski bazen Otoka“ d.o.o. Sarajevo videonazornim sistemom pokriva:
 - parking prostor,
 - tehnički dio objekta,
 - plivalište,
 - sve holove u objektu,
 - prostor tuševa, ali samo u hodnim linijama,
 - prostor svlačionica, ali samo u hodnim linijama.
- (2) Videonazorni sistem je smješten u posebnu prostoriju i povezan je sa monitorima.
- (3) U blizini svih kamera unutar, kao i sa vanjske strane objekta, na vidnom mjestu postavljen je znak sa natpisom „PAŽNJA! PROSTOR JE POD VIDEO NADZOROM“.

VI UPOTREBA PODATAKA (POJEDINOSTI OBRADJE LIČNIH PODATAKA)

Član 9.

- (1) Uređaji za snimanje (hard disc-ovi) i administrativni centar kontrole i obrade podataka nalaze se na prvom spratu objekta JP „Olimpijski bazen Otoka“ d.o.o. Sarajevo.
- (2) Kontrolor videonadzornog sistema je unutrašnja služba fizičke zaštite, koja ima svrhu odgovornog lica u skladu sa Zakonom o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13).
- (3) Kontrolor je odgovorno lice koje ima pristup monitoringu u realnom vremenu i arhivi videonadzora, te može slobodno da pristupa podacima i obrađuje podatke videonadzora u skladu sa članom 21.a Zakona o zaštiti ličnih podataka Bosne i Hercegovine.
- (4) Snimljeni materijal se ne može koristiti niti u jednu drugu svrhu osim za potrebe zaštite ljudi i imovine preduzeća.

Član 10.

- (1) U incidentnim situacijama pristup snimljenim podacima može se dati i ovlaštenim policijskim agencijama i ministarstva unutrašnjih poslova BiH, uz predočenje validnog naloga.
- (2) Da bi se video zapis dao policiji na uvid potrebno je da su ispunjeni sljedeći uslovi:
 - a) Da se desila incidentna situacija vezana za ugrožavanje sigurnosti imovine ili zdravlja ljudi,
 - b) Da je nadležni policijski organ podnio pismeni zahtjev za omogućavanje pristupa video zapisima sa jasno određenim vremenskim razdobljem za koji traži pristup video zapisima,
 - c) Da u arhivi snimljenog materijala postoji video snimak u traženom vremenskom razdoblju.

VII ZAŠTITA LIČNIH PODATAKA

Član 11.

U skladu sa članom 21.a Zakona o zaštiti ličnih podataka Bosne i Hercegovine obezbjeđuje se zaštita i obrada ličnih podataka prikupljenih putem videonadzora:

- a) Snimci pohranjeni putem videonadzora na osnovu kojih se može identificirati nosilac podataka predstavljaju zbirku ličnih podataka,
- b) Kontrolor koji vrši videonadzor dužan je donijeti odluku koja će sadržavati pravila obrade s ciljem poštivanja prava na zaštitu privatnosti i ličnog života nosioca podataka,
- c) Kontrolor će na vidnom mjestu istaći obavještenje o vršenju videonadzora i kontakt telefon,
- d) Zaštita same prostorije u kojoj se nalazi serverski ormar je osigurana putem protuprovalnog alarmnog sistema,
- e) Kontrolori, kao ni bilo koja druga osoba, ne smije koristiti podatke o osobama prikupljene videonadzornim sustavom zaštite izvan njihove zakonske namjene,
- f) Video zapis se čuva 30 (trideset) dana od dana nastanka nakon čega se briše.

Član 12.

- (1) Upotreba bazena podrazumijeva odlaganje odjeće i drugih ličnih stvari u za to predviđene prostore, što je razlog uvođenja video nadzora koji uključuje uvođenje uređaja za snimanje u svrhu identifikacije počinioca eventualnih krađa. U konkretnoj situaciji video nadzor je stavljen u funkciju i bez saglasnosti nosioca podataka (posjetilaca bazena) na osnovu člana 6. tačke e) Zakona u svrhu zaštite prava i interesa kako kontrolora videonazornog sistema tako i posjetilaca bazena.
- (2) Posjetioci bazena su upoznati sa video nadzorom, na način da je kontrolor podataka istakao natpis u skladu sa članom 22. Zakona.

Član 13.

Pravilnik podrazumijeva poštivanje člana 30. Zakona o radu u Federaciji Bosne i Hercegovine, koji se odnosi na postupanje sa ličnim podacima radnika.

STUPANJE NA SNAGU

Član 14.

Ovaj Pravilnik stupa na snagu danom donošenja, a objavit će se na oglasnoj tabli i web. stranici Preduzeća.

Član 15.

Izmjene i dopune ovog Pravilnika vrše se na način i po postupku koji važi za njegovo donošenje.

Broj: 01-2-1068-1/18

Sarajevo, 27.09.2018. godine

Predsjednica Nadzornog odbora
Amina Mujkić, s.r.